

四庫全書

史部

欽定四庫全書

建康實錄卷十九

唐 許嵩 撰

陳

高祖武皇帝

高祖姓陳氏諱霸先字興國吳興長城下若里人漢太  
丘長實之後本居潁川實玄孫晉太尉準準生匡匡生  
達永嘉初為丞相掾隨晉南遷拜太子洗馬出為長城

令悅其山水遂家焉常謂所親曰此地山川秀麗當有王者興焉二百年後我子孫必鍾斯運達生康康復為丞相掾晉成帝咸和中土斷故為長城人高祖即康之

九世孫也

原案陳書達生康康生盱眙太守英英生尚書郎公弼公弼生步兵校尉鼎鼎生散騎侍

郎高高生懷安令詠詠生安成太守猛猛生太常卿道巨道巨生皇考文績

父文績不仕文

績以梁天監二年歲次癸未生高祖少儻有大志意

氣雄傑好史籍讀書長於謀策明緯候孤虛遁甲又善

武藝不事產業家貧每以捕魚為事身長七尺五寸日

角龍顏垂手過膝髭生連骨普通中嘗遊義興館於許氏夜夢天開數丈有朱衣四人捧日而至納於高祖口中驚覺腹內猶熱心獨喜之初仕鄉為里正後逃於義興吳興太守蕭映過從之建業映遂用為夾苴吏尋轉為油庫長既而映鎮廣州奏高祖為中直兵參軍從至廣州映令高祖招集士馬先是武林侯蕭諮為交州刺史失德土人李賁連結郡縣反而高新二州刺史孫罔盧子雄等不進討賊皆伏誅子雄弟子略與孫罔子侄

及杜天合杜僧明等以兵攻廣州高祖率兵大破賊軍  
虜僧明等是歲梁大同十年梁高祖聞深異之遙授直  
閣將軍封新安縣子遣使圖其形貌入觀之既而蕭映  
卒高祖送映喪至大庾嶺梁帝詔高祖為交州司馬領  
武平太守與刺史楊髡南討李賁定交趾初楊髡委高  
祖經略衆軍發自番禺蕭勃為定州刺史於江西相會  
勃知軍士憚其遠役陰購誘之因詭說留髡問計於  
高祖高祖對曰交趾叛渙罪由宗室遂使僭亂數州彌

歷年稔定州復欲昧利目前不顧大計節下奉辭伐罪  
故當死生以之豈可畏憚宗室抵拒邦憲今若奪沮其  
衆何必交州討賊問罪之師即回有所措矣於是勒兵  
鼓行而進梁大同十六年六月軍至交州賁衆數萬於  
蘇麻江口城柵以拒官軍髡推高祖為前鋒所向摧陷  
賁走曲徹湖於屈獠洞界立砦大造船艦充塞湖中衆  
憚之頓於湖口不敢進高祖謂諸將曰我師已老將復  
疲勞歲月相持恐非長計且孤軍無援入人腹心若一

戰不捷豈得生全今藉其屢奔人情未固夷獠烏合易  
為摧殄只當共出百死決力取之無故停留王事去矣  
諸將皆默莫有應者是夜江水暴起七丈注湖中奔流  
迅激高祖勒所部兵衆乘流先進衆軍鼓噪隨之賊衆  
大潰賁竄入屈獠洞中洞中人斬賁傳首京師李賁兄  
天寶遁于九真因逼寇愛州梁太清元年高祖討天寶  
平之除振遠將軍西江督護高要太守梁太清二年侯  
景作亂廣州刺史元景仲謀同侯景高祖知之擊破之

殺景仲而迎定州刺史蕭勃為廣州刺史及京師不守  
高祖遣杜僧明胡頴等將兵二千屯於嶺上遂厚結始  
興豪傑同謀義舉以救京師侯安都張惲等率眾來附  
將東下蕭勃聞之使鍾休悅留高祖不許度嶺言侯景  
驍雄天下無敵援軍前後無敢當鋒嶺北王侯又已自  
相屠戮君之疎外豈可暗投未若且住始興以張形勢  
高祖泣謂休悅曰君辱臣死誰敢愛命吾行計決矣勃  
既不能止因令蔡路養等以兵遏高祖軍大寶元年正



月庚午高祖於始興大破蔡養譚遠軍於大庾嶺高祖  
進鎮南康南康今之虔州乃遣使間道往江陵稟承節  
度於梁湘東王蕭繹是為元帝帝承制授高祖持節明  
威將軍交州刺史改封南野縣伯高祖乃修南康古城  
居之人常遠望見城上有紫雲氣垂覆左右深結事之

尋遷南江州刺史改封長城侯大寶二年六月高祖發

自南康下頓西昌

案陳書南康頓石水舊有二十四灘  
灘多巨石行旅為難自高祖之發水

暴漲高數丈三百里間巨石皆沒時有龍見於  
水濱約高五丈五彩鮮明軍人觀者大歎慶焉時湘東

王遣征東將軍王僧辯督衆討侯景師次湓城高祖率

杜僧明侯安都等戈甲三萬將往會焉高祖聞西軍乏

糧乃分三十萬斛米以資西軍

案陳書高祖自下南江有軍糧五十萬石關西

軍乏糧乃分三十萬資之是年侯景廢簡文帝嗣而闕月五日龍見

於御路自太社至於象魏

太平二年春正月加高祖班劍三十人置丞相別榻以

近宸坐追贈高祖考侍中加金章紫綬封義興郡公謚

曰恭又追贈高祖兄道談為散騎常侍平北將軍封長

城縣公謚曰昭烈弟休光侍中使持節驃騎將軍南徐州刺史謚曰忠壯各邑二千戶遣侍中僕射陸繕策拜長城夫人章氏為義興國夫人追贈章夫人祖侍中追封高祖母許氏為嘉興縣君謚曰敬皇妣張氏義興國太夫人謚曰宣二月廣州刺史蕭勃反沿江而下江州刺史余孝頃起兵應之高祖命侯安都討平之秋八月甲午進高祖位太傅加黃鉞劍履上殿入朝不趨前後羽葆鼓吹皂輪車九月進加相國封十郡為陳公備九

錫之禮十月戊辰進爵為王加二十郡冕十有二旒建  
天子旌旗出警入蹕乘金根車駕六馬備副車置旄頭  
雲罕樂舞八佾設鐘簾宮縣陳臺百官一依舊式辛未  
梁敬帝禪位於陳王策命曰惟王乃聖乃神欽明文思  
二儀並運四節合敘天錫勇智人挺雄傑爰初投袂日  
夜勤王王公卿士莫不攸屬敬從人神之願授帝位於  
爾躬四海困窮天祿永終王其允執厥中乃命太保王  
通太尉長史王瑒奉皇帝璽綬受終之禮一依唐虞故

事是日梁敬帝方智遜位於別宮高祖三讓羣臣固請以梁太平二年冬十月乙亥設壇於南郊即皇帝位柴燎告天禮畢輿駕旋建康宮臨太極前殿大赦改梁太平二年為永定元年丁丑冬十月乙亥先是氛霧雨雪晝夜晦暝至此日景氣清晏詔百官文武進位有差先繫囚徒一切釋放奉梁帝為江陰王居晉陵行梁之正朔車騎服色一依前準官館資待務盡優假又降皇太后為江陰國太妃丙子輿駕幸鍾山祀蔣帝廟遣使宣

勞四方庚辰詔出佛牙於杜母宅集四部設無遮大齋  
帝出大司馬門致禮辛巳追尊皇考為景皇帝廟號太  
祖皇妃董氏為景太后追謚前夫人錢氏為昭皇后追  
謚世子克為孝懷太子立夫人章氏為皇后癸未尊景  
帝陵為瑞陵昭后陵曰嘉陵依梁初園邑故事追封兄  
道談為始興郡王謚曰昭烈追封母弟休光為南康郡  
王謚曰忠壯乙酉立刪定郎刊定律令十一月封兄子  
禧為臨川王遥襲封昭烈王子頊為始興王祀昭烈後

遥襲忠壯王子曇朗嗣南康王後

永定二年春三月王琳立梁永嘉王蕭莊於郢州以奉  
梁後令兵向建康使招北齊為援齊乃進兵助之四月  
甲子駕親祀太廟戊辰重雲殿東鵠吻有紫煙出屬天  
五月辛酉帝幸大莊嚴寺捨身壬戌王公已下奉表請  
還宮六月詔司空侯瑱徐度等討王琳七月新作太極  
殿欠一柱忽有樟木大十八圍長四丈五尺自流泊陶  
家後渚監軍鄒子度以聞詔起部尚書蔡儔兼將作大

匠取木以構之

案梁書侯景作亂王僧辯下平之縱軍士入宮探取火燒宮及太極殿薰西堂

省寺陳有天下至此復之耳

冬十二月甲子又幸莊嚴寺設無碍大

會捨乘輿法駕羣臣備禮奉迎還宮

三年春正月丁酉大雪太極殿前有龍跡見甲午廣州

有仙人見於羅浮山小石樓長三文通身潔白衣服麗

楚夏四月豫章太守熊曇朗反殺江州刺史周文育育

字景德義興陽羨人五月朔日有蝕之有司奏舊儀御

前殿合服朱紗袍袞冕之服自今永可為準丙寅扶南



使貢方物乙亥周文育喪至帝素服哭於朝堂哀慟甚  
因發疾六月丁酉帝不和遣太宰尚書左僕射王通以  
疾告太廟太宰中書令謝哲告太社及南北郊癸丑夜  
熒惑在心詔賜尚書令沈衆死 衆字仲監吳興武康  
人祖約父珽衆好學頗有文詞起家南平王參軍高祖  
即位遷侍中性鄙於財而不潔於己每於朝會中衣裳  
破裂或躬提冠履又薄於奉養在朝常服布袍芒屨以  
麻繩為帶及囊麥飯食之朝士咸共笑其所為性急於

忿恨非毀朝廷高祖大怒因其休假遂賜死帝漸疾甚  
詔迎臨川王薊入纂大業丙午高祖崩於璇璣殿秋七  
月甲寅大行皇帝遷殯於太極西階丙申葬於萬安陵  
在今縣東南三十里彭城驛側周六十步高二丈帝年  
五十五即位在三年年五十七謚武帝廟號高祖帝  
神武莫儔英謀獨斷性貴儉素志賤浮華常膳進不過  
數品私饗曲宴皆用瓦器蚌盤肴庶珍羞纔足而已自  
總軍要及即位玉帛子女悉頒將士歌鐘伎樂不列於

前末年躬儉彌篤

世祖文皇帝

帝諱葦字子華始興昭烈王長子

案陳書昭烈王是高祖第二兄也少

沉敏有識量美容儀精經史高祖甚愛之常稱此兒吾

家英秀也梁太清初葦曾夢兩日鬪一大一小大者光

滅墮地葦取而懷之侯景之亂避地於臨安縣郭文舉

舊宅及高祖與王僧辯東下帝為侯景所收以幽禁之

數欲加害會景敗乃免

原案陳書侯景初聞高祖舉義兵景怒使叔世祖及衡陽獻王

囚之初世祖見收乃密懷一小刀冀因便而害景及至以付郎中王翻幽守故事不獲行高祖既圍石頭欲加害者數矣會景敗乃免起家為吳興太守高祖討王僧辯先密令

世祖防備僧辯腹心人震州刺史韋載杜龕等據吳興遣使掩襲舊士卒皆惶恐失色而帝獨言笑處分益明及高祖遣周文育討杜龕舊已先攻下之拜為會稽太守高祖即位進封臨川王拜侍中安東將軍永定三年六月丙午高祖崩遺詔徵帝入纂皇儲甲寅至自南皖辭讓再三羣臣內外固請其日入居中書省皇太后令

曰昊天不弔上玄降禍大行皇帝奄棄萬國諸孤藐爾  
反國無期須立長君以寧寓縣侍中臨川王四海宅心  
可膺寶籙是日具禮儀即位於太極前殿大赦公卿百  
官進位一等尊皇后為太皇后詔封子伯茂為始興郡  
王繼昭烈之後賜為父後者爵一級 伯茂字鬱之初  
昭烈王仕梁為東宮直長後值侯景亂中流矢卒高祖  
即位追贈驃騎大將軍太傅揚州牧始興郡王生帝及  
安成王瑒梁江陵陷安成王遷於關右高祖襲封安成

王為始興祀及帝以本宗之饗詔改封嗣王頊為安成  
王封伯茂為始興王以奉昭烈祀初東征北軍於丹徒  
盜發晉郗曇墓大獲晉王羲之書及諸名賢遺跡事覺  
其書悉入於祕府帝以伯茂好書賜之由是大工草隸  
秋七月尚書八座奏請立皇后及諸王太子九月辛酉  
立皇子伯宗為皇太子立妃沈氏為皇后十一月乙卯  
王琳進寇大雷前鋒逼梁山詔太尉侯瑱禦之

天嘉元年正月大赦改元賜鰥寡孤獨孝悌力田粟各

五斛甲寅發使宣勞四方二月辛卯老人星見丙申侯  
瑱大破王琳於梁山敗齊軍於博望擒王琳下將劉伯  
球王琳及梁王蕭莊走齊之鍾陵三月丁巳江州刺史  
周迪追斬賊帥熊曇朗於新塗 曇朗豫章南昌人世為  
郡著姓曇朗跣跑不羈有膂力容貌甚偉侯景之亂因  
聚少年據豐城縣多為劫盜梁元帝平侯景拜巴西太  
守江陵陷後遂劫掠隣縣縛賣人民山谷之中最為巨  
患高祖即位以曇朗南川豪帥拜颯猛將軍桂州刺史

與周文育討余孝勣既而反害文育盡收其衆以應王琳乃修新塗縣城居之及王琳東下南川兵為曇朗所梗江州刺史周迪與高州刺史黃法氈等會兵攻曇朗曇朗敗走入山村村民斬之傳首京師懸於朱雀觀於是盡收其宗黨無少長皆棄市是月驃騎將軍湘州牧衡陽王昌薨於魯山江中夏四月喪至帝親臨詔謚獻王立第七子伯信為衡陽王奉獻王祀六月壬辰葬梁元帝於江寧舊塋車旗禮章並依梁典帝臨於太極前



殿百寮陪哭秋八月戊子詔非兵器及國容所須金銀珠玉衣服雜玩悉皆禁斷九月乙卯周將獨孤盛與賀若敦等水陸引軍趨巴湘兩道俱進太尉瑱自尋陽往破盛等於楊葉洲是歲以侍中國子祭酒周宏正使長安迎帝弟安成王頊周人并留之

天嘉二年正月高麗倭國及百濟並遣使貢方物六月齊人通好冬十月乙卯東夷遣使朝貢乙未領大著作虞荔卒荔字山披會稽餘姚人祖權父儉荔幼而聰

敏年九歲太常陸倕問五經凡十條荔隨問應答無遺  
失及梁末將母入臺城尋遇城陷情禮不申由是蔬食  
布衣不聽音樂及陳受禪世祖嗣位除太子中庶子尋  
領大著作荔第二弟寄寓於閩中為陳寶應留連不得  
還荔每言之流涕帝哀之曰我有弟在遠此情甚切他  
人豈知乃勅寶應求寄寶應終不遣荔亦感疾年五十  
九卒柩還鄉里世祖親送人以為貴子世基世南並知  
名寄字次安年數歲有人嘲之曰郎君姓虞必定無

智寄應聲曰文字不辯豈得非愚客大慙陳寶應破後  
乃歸朝拜大中大夫是歲南安將軍周迪不受徵與留  
異結構謀逆

天嘉三年正月庚戌設帷於南郊告胡公以配天是月  
後梁蕭詧薨子巋代立二月安成王頊自後周還帝見  
之大喜以功進周弘正位金紫光祿大夫以安成王頊  
為司空閏二月甲子改鑄五銖錢三月周迪留異等舉  
兵反司空侯安都破之於桃枝嶺

四年三月甲申留異等走投閩州刺史陳寶應寶應納  
之五月己巳太白晝見是日侯安都自盡 安都字成  
師始興曲江人善書能鼓琴好騎射自始興內史主簿  
招集兵馬得三千人討侯景與高祖攻破蔡路養下平  
侯景有功梁元帝封為猛烈將軍隨高祖鎮京口定計  
入誅王僧辯自石城北捨舟登岸被甲帶長刀踰城北  
女牆而入僧辯臥室以功授散騎常侍南徐州刺史既  
而秦郡太守徐嗣徽等引北齊入寇安都領水軍於中

路斷賊糧運并收其家口騾馬鷹犬及嗣徽所彈琵琶  
嗣徽大懼請和時紹泰元年也明年嗣徽又入丹陽至  
姑孰高祖使安都拒之大戰破於高橋斬徽生擒齊儀  
同乞伏無芳追敗於蔣山龍尾及幕府山累以戰功封  
曲江公給鼓吹一部世祖嗣位討留異於桃枝嶺中流  
矢血流至踝容色不變收其妻子人馬甲仗振旅而歸  
自以勲庸漸高驕恣數招文武之客陰鏗褚才張正見  
等每有表啟事所未盡乃開封更自書之云又啟某事

及侍宴酒酣或箕踞傾倚自白帝曰何如作臨川王日  
帝佯不應乃再三言之帝曰此雖天命亦明公之力也  
或坐御牀賓客稱壽後重雲殿災安都帶甲而入帝惡  
之出為江吳二州刺史征南大將軍自京口還都於石  
頭世祖引安都宴於嘉福殿又集會將帥於朝堂坐上  
收安都囚之西省出中書舍人蔡景歷表以示於朝數  
安都之罪詔速刑書是日安都上表陳謝自殺六月丁  
未夜白虹兩道出北斗間秋七月乙未皇太子納妃朱

氏在位文武賜帛有差九月辛丑周迪復寇臨川詔護軍將軍章昭達討平之十二月昭達軍次建安討陳寶應丙申大赦殊死已下

五年四月庚子太白歲星合在奎中十一月章昭達擒陳寶應留異等 異東陽長山人少豪雄多聚惡少凌侮貧賤守宰皆患之起家為梁朝蟹浦戍主紹泰二年自安固令有應接功領東陽太守封永興縣侯累遷散騎常侍信威將軍陳文帝長女安豐公主配異第三子

貞臣徵異為南州刺史異不進尋改東陽太守異遣長  
史王漸入朝還言朝廷虛弱異信之外示臣節內懷兩  
端遣使自鄱陽信安嶺潛通於王琳分兵戍下淮及建  
德以備江路帝使侯安都討之異本謂官軍自錢唐江  
而上安都乃密由會稽諸暨步道襲之異聞兵至走桃  
枝嶺安都進破之異與第二子忠臣及周迪等奔陳寶  
應 寶應晉安侯官人世為閩土著姓多變詐梁朝晉安  
數為反叛屢殺守將陳寶應因官軍鄉導討平之由是



一郡兵權皆自己出帝嗣位錄其功命入宗室并遣使  
條其子女無大小並加封爵及安都討留異寶應乃遣  
兵助異帝大怒命章昭達督衆軍由建安南道度嶺又  
命余孝頃督會稽東陽臨海永嘉等兵討之詔宗正絕  
其屬籍寶應遂據建安湖際逆拒王師水陸為柵昭達  
至深溝高壘不與戰達命軍士伐竹木為筏俄而水盛  
遂乘流放筏突其水柵而使步騎薄之寶應衆潰追擒  
於草中并留異等同逆者俱送建康市斬之是日詔討

陳寶應將士亡者並與棺木遞還本土

六年正月乙酉皇太子加元服王公已下賜各有差六月周人來聘七月癸未大風自西南至纔廣百餘步激

壞靈臺候館甲申儀賢堂前架無故自壞

原案儀賢堂吳時造號為

中堂在宣陽門內路西七間亦名聽訟堂每年策孝廉秀才考學士學業歲莫習元會儀於此前在鴻臚寺西南衛尉府南宗正寺太僕寺大弩署脂澤庫更南即太史署太府寺東南角逼路宣陽門內過東即客省石尚方並在今縣城東一里二百步丙戌臨川太守駱牙風觀後隔路儀賢堂更近北也

斬周迪於山穴傳首建康梟於朱雀門 迪臨川人少

居山谷有膂力能挽彊弩以弋獵為事梁元帝平侯景以功遷振遠將軍高祖秉政加江州刺史及即位王琳東下至湓城與新吳洞主余孝頃相合衆二萬來趨工塘連八城以逼周迪迪使周敷率兵頓臨川故郡迪自斷江口與樊猛等戰大破之屠其八城生擒李欽樊猛余孝頃遞送建康市收其器械軍實山積虜其人馬並自納之永定二年以功進迪平南將軍開府儀同三司給鼓吹一部王琳既平帝徵迪出鎮湓城令子入朝迪

乃顧望生疑不至及帝錄破熊曇朗功加周敷黃法甌  
等官賞廸甚不平遂陰與留異相結及王師討異廸疑  
恐不安乃令弟方與率衆襲周敷於豫章不利而退三  
年帝使章昭達討廸衆潰妻子悉擒乃脫身踰嶺赴  
晉安依陳寶應寶應使兵助之明年秋復越東興嶺世  
祖使程靈洗等破之廸竄山穴中日月既久遣人潛出  
臨川郡買鮭魚使人脚痛舍於邑子邑子告太守駱牙  
牙執之令取廸自効因使勇士隨入山中誘廸出獵伏

兵斬於道傍傳首京師

七年春二月丙子大赦改元為天康元年三月己卯進

司空安成王頊為尚書令夏四月癸酉帝崩於有覺殿

丙戌葬永寧陵

陵在今縣東北四十里陵山之陽周四十五步高十丈九尺

帝年四

十即位在即位八年羣臣上謚曰文皇帝廟號世祖帝起

自布衣知百姓艱難疾苦國家資用務在儉約常所調

斂事不獲已者必咨嗟改色妙識真偽下不容奸一夜

內刺閹取外事分判者前後相續每鷄人伺漏傳籤於

殿中者令投之於階石上使鏘然有聲云吾雖眠睡亦令驚覺其終始自彊梗槩如此

### 廢皇帝

帝諱伯宗字奉業文帝嫡子梁承聖三年五月庚寅生永定二年春二月戊辰拜臨川王世子三年文帝嗣位八月立為皇太子自梁侯景亂離東宮焚火太子居永福省天康元年四月癸酉文帝崩是日即位於太極前殿大赦內外復職遠方悉停赴喪五月上尊皇太后為

太皇太后皇后曰皇太后以司空安成王頊為司徒錄  
尚書都督中外諸軍事始興公伯茂為征東將軍袁樞  
為尚書左僕射沈欽為右僕射七月丁酉立妃王氏為  
皇后 后諱少姬侍中金紫光祿大夫固之女天嘉四年  
聘為太子妃 固字休堅瑯邪臨沂人祖汾父林固少  
涉史籍以梁帝外甥封英口亭侯舉秀才起家為尚書  
郎太子洗馬高祖即位累遷至侍中禮遇甚厚性信佛  
法嘗禪坐誦經又妙於玄言使聘魏國宴饗請救一羊

羊於固前跪足而拜又宴昆明池魏朝以固南人嗜魚  
大設罔罟於水中固以佛法呪之一無所獲冬十月享  
於太廟十一月乙亥周人來弔

光大元年春正月辛亥改號辛卯祠南郊大赦二月南豫  
州刺史余孝頃反伏誅五月湘州刺史華皎反引後周  
為援六月詔征南大將軍淳于量討平之七月戊子立  
皇子至澤為太子九月周將元定入郢州與華皎水陸  
俱進淳于量吳明徹等逆擊大破之皎單舸奔江陵擒



元定送建康

卷十九

二年春正月以侍中安成王頊為太傅領司徒揚州牧  
加殊禮劍履上殿入朝不趨贊拜不名庶子以淳于量  
為中軍大將軍四月辛巳太白晝見五月丙辰太傅安  
成王獻玉璽一紐六月丁卯彗星見九月新羅林邑狼  
牙修國並使朝貢時安成王與僕射到仲舉中書舍人  
劉師知等恒在禁中參決眾務而安成王為揚州刺史  
左右甲仗三百人入居尚書省十一月劉師知到仲舉

等見安成秉政惡其權重陰說於帝矯太后令下詔安成王曰今四方無事可遷東府經治州務安成將出毛喜馳入止之曰王今出外便受制於他人譬如曹爽願作富家翁不可得也此必師知等矯太后之令請覆之安成大懼乃稱疾召師知留與語遂遣毛喜入言白於太后太后曰今伯宗年幼政事並委二郎此非我意喜出以報安成安成囚師知自入見后及帝極陳師知之過乃自草勅收師知付廷尉獄賜死自是政事大小皆

決於安成王王以上流多反叛乃諷慈訓太后甲寅太  
后令廢帝為臨海王送之藩邸詔曰太傅安成王頊固  
天生德齊聖廣深二后鍾心三靈佇眷自先朝不豫任  
總邦家威惠相宣刑禮兼設且地彰靈璽天表長彗除  
舊布新禎祥咸顯文皇知子之鑿事甚帝堯傳弟之懷  
允符太伯今可崇立賢君內外宜依舊典以興駕奉迎  
是日廢帝出居別第大建二年四月乙卯薨年十九帝  
仁弱無人君之量世祖每虞不堪繼業既居家嫡廢立

事重是以依違積年及將大漸召高宗謂曰吾欲遵太  
伯之事高宗初未達旨良久方悟乃拜伏流涕固辭其  
後宣太后依先帝之旨乃此廢帝焉

建康實錄卷十九

欽定四庫全書

建康實錄卷二十

唐 許嵩 撰

陳

高宗孝宣皇帝

高宗孝宣皇帝諱頊字紹世世祖母弟始興昭烈王第二子梁中大通二年七月辛酉生於鄉里產夕有赤光滿室帝少寬大多智略及長美容儀身長八尺垂手過

膝有勇力善騎射高祖平侯景梁元帝使徵高祖子姪  
入侍帝赴江陵累官至直閣將軍中書侍郎忽酒醉假  
寐於室馬軍主李總見是大龍乃驚走人密竒之江陵  
陷帝隨例遷於關右高祖即位永定初遙襲封為始興  
郡王文帝嗣位遙改安成王天嘉三年自周還累至侍  
中廢帝立進驃騎大將軍錄尚書尋轉太傅揚州牧光  
大二年十一月甲寅慈訓太后黜廢帝為臨海王而召  
帝入三年正月甲午改元

太建元年即位於太極前殿大赦進文武位一等復太  
后尊號曰太皇太后退文皇太后沈氏為文皇后 后字

妙姬吳興武康人建成侯法深之女永定元年策為臨

川王妃世祖即位為皇后廢帝即位尊為皇太后及安

成東政后憂悶計無所出乃賂宦者蔣裕令誘建安人

張安國使據郡反因此以圖安成尋而事覺遂誅安國

等及帝立乃黜后為文皇后

案陳書后妃傳陳亡入隋  
大業初自長安東歸江南

頃之

卒 乙未謁太廟立妃柳氏為皇后以嫡子叔寶為皇



太子封諸子為郡王丁酉使御史出四方觀行風俗以  
沈欽為左僕射王勳為右僕射辛丑祀南郊七月辛卯  
太子納妃沈氏王公已下賜帛有差十月廣州刺史歐  
陽紇據南海反詔章昭達討平之 紇字奉聖長沙臨

湘人父頡梁左衛將軍紇隨蘭欽南征東徠擒陳文徹  
獲輜重及獻銅鼓累代無此器高祖即位進散騎常侍  
封陽山公紇有幹略天嘉四年除黃門侍郎遷安遠將  
軍襲封陽山郡公都督交廣越定明新高合羅愛建宜

黃利雙石等十九州軍事廣州刺史在州十餘年威名著於西越帝以紇久在南方意頗疑之大建元年詔徵還朝廷紇懼未敢動左右乃勸令反遂舉兵攻衡州衡

州刺史錢道戢告變帝遣章昭達討擒紇送京師年三

十三家口籍沒

案陳書江總紇之故人收其子詢撫養之及長善草隸書博學著藝宣百卷皇

朝位銀青光祿大夫也

大建二年春三月丙申太皇太后崩於紫極殿祔葬萬安陵謚曰宣太后 太后字要兒本姓鈕氏幼為章氏所

養因姓章氏母蘇氏嘗遇道士以龜遺之光彩五色曰  
三年有徵及期生后產夕紫光照室因失龜所在后少  
聰慧美容儀手爪長五寸色並紅白每有期功之事則一爪  
先折后善書計能誦詩及楚詞高祖永定元年立為皇  
后及高祖崩后與中書舍人蔡景歷定策秘不發喪乃  
詔世祖入纂皇業世祖即位尊為太后居慈訓宮光大  
元年下令黜廢帝命宣帝嗣業至是崩年六十五四月  
乙巳太白晝見五月齊人來弔

大建三年辛卯正月癸丑以著作徐陵為尚書僕射辛酉祀南郊二月辛巳祀明堂丁酉耕藉田三月大赦五月丹丹天竺盤盤等國貢方物八月辛丑太子釋奠於太學十二月壬辰章昭達薨昭達字伯通吳興武康人性倜儻輕財尚氣少時嘗遇相者謂達曰卿容貌大善須小虧損當富貴耳後因醉墜馬鬚角小傷相者曰未也及侯景亂昭達募鄉人援臺城為流矢所中眇其一目相者曰卿相善矣侯景平後與文帝結君臣之

分及王僧辯誅後杜龕反遣杜泰攻長城世祖命昭達  
總知城內兵事以拒杜龕龕等退走追討平之累戰功  
拜交州刺史隨侯安都拒王琳於沌口為前鋒破琳冊  
勲為都督巴郢武源四州諸軍事封欣樂縣侯給鼓吹  
一部天嘉四年陳寶應與周迪等寇臨川詔昭達為都  
督討平之進位前將軍開府儀同三司初世祖曾夢昭  
達升於台鉉及旦以夢告之至是侍宴世祖顧昭達曰  
卿憶夢否何以償之昭達謝之曰當効犬馬以盡臣節

大建初討歐陽紇於嶺南以功拜司空一年率師征蕭  
歸歸與周軍大蓄船艦於青泥中昭達分遣偏將錢道  
戢程文秀乘輕舟襲之焚其舟楫周兵又於峽下南岸  
築壘名曰安蜀城兼令於江上引大索編葦為橋以度  
軍糧昭達命軍士為長戟施於樓船上仰割其索索斷  
糧絕因縱兵攻其城降之薨時年五十四

大建四年八月辛未周遣使來聘丁丑景雲見九月庚  
子朔日有蝕之詔徐度杜稜程靈洗等配食武帝廟庭

章昭達配食文帝廟庭十一月己亥夜地大震十二月  
衛尉卿許亨卒 亨字亨道高陽新城人晉徵君許詢

字玄度六代孫祖勇惠齊冗從僕射父懋梁始平天門  
二郡太守太子庶子散騎常侍以學聞撰毛詩風雅比  
興義十五卷亨少傳家業有節行博通羣書多識前代  
舊事解褐梁安東王行軍參軍兼太常博士遷太尉從  
事中郎晉安王承制授給事黃門侍郎高祖即位拜大  
中大夫領大著作修梁史初高祖誅王僧辯父子數人

同瘞一穴至是無敢言者亨以故吏抗表請葬僧辯世  
祖許之乃與徐陵張種孔奐等以家財營葬具凡七柩  
自石頭城改窆於方山東南亨卒時年六十四所撰齊  
史五十卷文集六卷子善心入隋位至尚書度支郎有  
應對才遷禮部侍郎有集二十卷後為宇文化及所害

五年春二月夜有白氣如虹自北斗貫紫微宮三月丙  
戌西衡州獻馬生角詔吳明徹為征討大都督北伐統  
軍十萬發自白下四月大破齊師於淮南九月壬辰晦



夜明乙巳吳明徹尅壽陽斬王琳傳首京師梟於朱雀  
航琳太原人少無學業而彊記內敏事多記識軍中  
萬人盡記名姓累官梁元帝司空梁敬帝太平二年見  
高祖方盛梁祚漸衰懼梁社稷將亡遂與諸將謀迎  
梁元帝孫永嘉王莊於北齊歸立為主號天啟元年正  
月設壇於南浦之南備法駕即帝位幸江夏新宮臨定  
武前殿以琳為都督中外軍事天嘉二年世祖遣侯安  
都討大破之琳與蕭莊俱奔齊齊以莊為揚州刺史與

王琳鎮壽春至是吳明徹破之是歲諸軍略地所在皆

尅捷淮南諸郡悉平之

原案梁書自侯景亂江右淮北州郡皆沒北齊及江陵陷失高

祖輔政而徐嗣徽任約等招引北齊軍變江南高祖即位王琳復起上流而敗西據壽陽以歸於齊高宗即位

五年大舉始收淮南之地

六年正月壬戌大赦江右淮北諸州甲申周人來聘二

月壬辰耕藉田四月庚子彗星見八月尚書右僕射周

弘正卒 弘正字思行汝南安成人晉僕射顓九代孫

祖顓父寶弘正幼聰惠年十五為國子生季春入學孟

冬應舉解褐梁晉安王主簿累國子博士初梁武帝於  
城西立士林館延弘正居之以講授聽者傾朝嘗啟梁  
主決定周易疑義凡五十條性博物善占大同末知天  
下將亂謂弟弘讓曰國家厄運數年當有義兵起吾與  
汝何處逃刑及梁納侯景之降弘正曰亂階此矣梁元  
帝平侯景徵弘正為黃門侍郎累遷散騎常侍與王褒  
論利害諫元帝下都建康荆峽人士皆云周王皆是東  
人恣求東下恐非良計弘正面折曰若東人勸東下謂

非良計即西人欲西豈成良策元帝大笑竟不還都及  
魏平江陵弘正遁歸建康高祖踐阼拜太子詹事天嘉  
元年遷侍中國子祭酒使長安迎安成王三年還授金  
紫光祿大夫進右僕射弘正善玄言明釋典雖名僧碩  
德皆請質疑滯卒時年六十所著易疏十六卷論語疏  
十卷莊子疏八卷老子疏五卷孝經疏兩卷文集二十

卷子墳官至吏部郎

原案陳書云弘讓亦博學天嘉初  
以白衣領太常卿金紫光祿大夫

猶子確位南平府長史  
行揚州事代稱良吏也

七年春正月乙亥衛將軍樊毅尅潼州城辛巳祠南北  
郊三月詔豫二兗譙徐合霍南司定等九州及所部在  
北諸郡置雲旗義士徃與大軍及諸鎮守備防禦四月  
庚寅豫州刺史陳桃根獻青牛詔還百姓乙未桃根又  
獻織成羅文錦被表各二詔於雲龍門外焚之六月丙  
戌詔北征將士死王事者尅日舉哀乙酉改作雲龍神

虎二門

原案宮殿簿雲龍是二宮牆東面門晉本名東華門東出東掖門梁改之西對第三重牆萬春

門神虎門是第二重宮牆西面門晉本名中華門西出西華門本晉西掖門宋改名西華門東入對第三重宮

墻千秋閏九月壬辰吳明徹大破齊軍於呂梁是月廿  
秋門

露三降樂遊苑丁未幸樂遊採甘露宴羣臣詔於苑內  
覆舟山上立甘露亭十一月甲子南康郡獻瑞鍾一口  
是歲殷不害自周還優詔拜為司農卿尋遷光祿大夫

不害字長卿陳郡長平人祖汪父高明不害性至孝  
少知名家世儉約居甚貧窶年十七事梁累遷平北府  
咨議參軍侯景亂臺城陷文武奔散惟不害與徐摛侍  
梁簡文於永福省及簡文幽繫請不害同處侯景許之

不害供侍益謹簡文夜夢吞一塊土意惡之以告不害  
不害曰昔晉文出奔野人遺塊卒返其國簡文曰若神  
道有知尚冀言之不忘及元帝即位拜廷尉卿尋又江  
陵陷因失母所在時當寒雪凍死者填滿溝壑不害涕  
泣號呼尋見死人在溝者則身自捧視舉體凍僵水漿  
不入口者七日始得母屍憑屍而哭行路為之悲哀及  
殞後與王褒庾信等同入長安布衣蔬食至此年方得  
還累進給事中

原案陳書後禎明三年隋  
滅陳又西入隋卒於道

弟不疑不占

不齊不佞

八年春正月庚辰西南紫雲見拜吳明徹為司空錄左僕射王克為右僕射九月立皇子叔彪為淮南王叔齊叔文皆為郡王

九年丁酉春正月後周滅北齊

齊主高緯方禪位於其太子恒改元承光周師

平鄴緯與恒赴長安

二月壬子興駕耕藉田七月庚辰

大風雨震萬安陵華表癸卯震瓦棺寺重門一女子死十月吳明徹大破周將梁士彥於呂梁修東宮成十二



月移太子居新宮

原案輿地志其地本晉東海王第後  
築為永安宮穆章何皇后居之宋文

帝元嘉十五年始築為東宮齊宋為火災焚盡梁天監  
五年更修築於故齊地盛加結構侯景亂又燒盡陳初

置太子於永福  
省至此居新宮

十年春正月己巳以中領軍廬陵王伯仁為平北將軍  
是月散騎常侍太子右衛率韋載卒 載字德基京兆

杜陵人祖叡父正載少聰惠好學年十三沛國劉顯問  
漢書中十事隨問隨答略無疑滯自歷職位常樂退靜  
有田十餘頃在江乘縣之白山遂辭疾去官築室居焉

屏絕人事吉凶慶弔無所往來不入西籬門或十年年  
五十八卒於家夏六月大雨震大皇寺刹莊嚴寺露盤  
重陽閣東樓千秋門內槐樹鴻臚寺府門是月司空吳  
明徹薨 明徹字通照秦郡人父樹梁右軍將軍明徹  
幼孤性至孝年十四感墳塋未修家貧未辦乃勤力耕  
種遇大旱苗稼焦枯明徹哀憤每至田中號哭仰天告  
愬居數日有自田回者云苗已更生明徹疑之及往果  
如所言至秋大穫足充葬用有尹生善占墓謂其兄曰

君家葬日必有乘白馬逐鹿者來經墓所是最小孝子  
大貴之徵也至時果有應明徹樹之小子也起家梁東  
宮直後及侯景亂天下飢明徹有粟麥三千餘斛鄉里  
飢乃白諸兄曰當今草竊人不圖生既有粟麥可與鄉  
里人共之於是計口平分同為豐儉羣盜聞而避之高  
祖鎮京口深相要結降階執手明徹妙解天文孤虛遁  
甲高祖竒之以梁承聖三年請為戎昭將軍高祖踐阼  
拜散騎常侍兗州刺史宣帝大建五年加侍中都督征

討諸軍事北伐賜女樂一部封南郡公總戎十萬發自京師所向皆剋捷八月進逼壽陽王琳拒守明徹乘夜攻之中宵而潰琳等退據相國城及金城明徹遏肥水以灌之城中苦溼多腹疾手足皆腫死者十有六七齊遣大將皮景和率兵數十萬來援去壽春三十里頓軍諸將皆曰計將安出明徹曰兵貴在速而彼結營不進吾知其不敢戰也於是躬擐甲胄四面疾攻城中震恐一鼓而剋生擒王琳斬之傳首京師宣帝優詔褒崇加

車騎大將軍豫州刺史就壽春授冊明徹於城南設壇  
士卒二十萬陳其旗鼓戈甲登壇拜受成禮而退士卒  
無不踴躍六年率諸將渡淮北七年閏九月大破齊軍  
於呂梁八年進位司空九年詔明徹北侵軍至呂梁周  
將梁士彥拒戰頻破之會明徹苦背疾拔軍至清口衆  
軍皆潰明徹窮蹙就執以憂遘疾卒於長安九月乙巳  
立方明壇於婁湖臨壇誓衆乙卯分遣大使以盟誓頒  
下四方上下相警以備周人

十一年乙亥春正月龍見於南兗州永寧樓側池中七月辛卯初用大貨六銖錢丁卯於大壯觀閱武十一月戊午周將梁士彥圍我壽陽尅之又尅霍州是月以始興王叔陵為征討大都督率水步衆軍以拒周師十二月乙丑南北兗晉三州及盱眙山陽陽平馬頭秦郡歷陽沛北譙南梁等九郡民並自拔以歸建康周又進尅譙北徐二州乘勝而前自是淮南之地復盡歸於周矣十二年庚子六月大風吹壞臯門中闔是月黃門侍郎

顧野王卒

野王字希馮吳郡吳人也祖子喬父烜野

王幼以儒術知名年七歲誦五經略知大旨九歲能屬  
文十二隨父之建安乃撰建安地記二篇及長遍觀經  
史精記默識天文地理著龜占候二篆竒字無所不通  
起家梁太學博士中領軍府記室陳有天下遷黃門侍  
郎光祿卿年六十二卒野王少篤學在物無過辭失色  
觀其容貌似不能言及其勵精力行皆人莫及又善丹  
青曾於東府六齋畫古賢命王褒書讚世人稱為二絕

又撰玉篇二十卷輿地志三十卷符瑞圖十卷顧氏譜  
十卷分野樞要一百卷通史要略一百卷國史紀傳二  
百卷續洞冥記一卷玄象表一卷文集二十卷並行於  
世秋八月乙未周鄖州總管司馬消難以所統九州八  
鎮之地來降詔消難為大都督充九州八鎮諸軍事遷  
司空給鼓吹女樂一部率衆江北授之大軍北伐是月  
遣南豫州刺史任忠率衆趨歷陽陳惠紀趨南充州庾  
午散騎侍郎淳于陵尅臨江郡癸酉魯廣達尅郭默城



甲戌大雨霖丙子淳于陵尅祐州城九月周臨江太守  
劉顯光率衆來降是月天東南有聲如風水相激三夜  
乃止丁亥周將王延貴率衆來援歷陽任忠擊破之擒  
延貴以送建康己酉周廣陵義軍主曹藥率衆來降

十三年辛丑以晉王伯恭為尚書左僕射袁憲為右僕  
射二月乙亥親耕藉田四月乙巳分衡州始興郡為東  
衡州以本衡州為西衡州七月徵君馬樞卒 樞字要

理扶風郿人寓居京口祖靈慶樞少好學六歲能誦孝

經論語及長博極經史尤善佛經及周易老子義梁邵  
陵王綸為南徐州刺史引為學士命講維摩老子周易  
同日三部一齊發題論者縱橫樞隨問剖判應接如流  
論者拱默而退綸甚竒之及征侯景留書二萬餘卷與  
之常閒居喟然歎曰吾聞貴爵位者以巢由為桎梏愛  
山林者以伊呂為管庫束名實則蕩芥柱下之言翫清  
虛則糠粃席上之論稽之焉論亦各從其所好乃隱於  
茅山則終焉之志陳天嘉元年世祖徵為度支尚書辭

不應命每王公大人有饋餉辭不獲免者十分受一屬  
世亂所居盜賊不入依托者數百家皆得全樞目精洞  
黃能視暗中物常有白鷺一雙巢其庭樹馴狎欄廡年  
八十六卒撰道覺論行於世九月癸亥夜大風從西北  
來發屋拔樹大雨雹十二月辛巳彗星見西南是歲周  
靜帝文衍遜位於隋文帝楊堅改元開皇元年周三代  
五帝二十五年

十四年春正月己酉帝不豫甲寅崩于宣福殿二月癸

己葬顯寧陵帝年四十即位  
在位十四年年五十三謚  
曰孝宣帝廟號高宗有子  
四十二人遺詔庶事務從  
儉約金銀之飾不入墻明  
器皆令用瓦初帝在田本  
有恢弘之度及居尊位實  
允天人之望于時國步初  
弭創瘼未復淮南之地並  
入於齊帝志復舊境返侵  
地而疆弱懸絕適足為禽  
及周滅齊乘勝而舉略地  
又至江際自此懷懼既而  
力修城隍為扞禦之備獲  
銘曰二百年後當有癡人  
修吾破城者時莫測所從  
云

後主長城公叔寶

後主諱叔寶字元秀小字黃奴宣帝嫡長子梁承聖二年十一月戊寅生於江陵天嘉三年立為安成王世子大建元年正月甲午立為皇太子十四年正月甲寅宣帝崩乙卯始興王叔陵構逆叔陵字子嵩高宗第二子承聖中生於江陵天嘉三年封康樂侯少有機辯徇聲名彊梁無所摧屈大建元年封始興王出使江郢晉三州軍事始年十六政自己出寮佐莫敢預焉弟叔堅爭

寵招致賓客每朝會鹵簿不肯為先後必分道而趨高宗不之知叔堅後主同侍寢疾便陰有異志乃命典藥吏曰劉藥刀甚鈍可礪之及高宗崩倉卒之際速命左右取劍左右不寤乃取朝服木劍以進叔陵怒叔堅在側聞之知有變伺之翌日少殮叔陵取劉藥刀趨進斫後主中項後主悶絕於地太后與後主乳母樂安君吳媪以身蔽之叔堅自拖叔陵并奪其刀將欲殺之後主不能處分叔陵多力自奮得脫突出雲龍門入東府召

左右斷青溪橋道放東城囚以為戰士遣人往新林追所部兵馬仍自被甲著白布帽登城西門以召百姓太后使太子舍人司馬申以後主命召蕭摩訶討之叔陵又遣記室韋諒送鼓吹與摩訶仍謂曰事捷必以公為台鼎摩訶不報當日執將軍戴洳譚騏驎二人送臺斬之叔陵自知不濟乃入內沉其妃張氏及寵妾七人於井中部麾下度小航將趨新林蕭摩訶追擒於白楊路斬首送臺流屍於江中丁巳後主即皇帝位於太極前

殿大赦如宣帝故事以丹陽尹長沙王叔堅為驃騎大將軍尊皇后為太后居栢香殿 太后諱敬淑姓柳河東解人父偃尚梁武長公主拜駙馬都尉大寶中鄱陽太守卒官後高宗赴江陵梁元帝以後配焉生後主江陵陷與後主俱留穰城文帝天嘉二年高宗自周還立為安成王妃及即位為皇后后美姿容身長七尺二寸垂手過膝初錢貴妃甚寵后傾心下之每有供奉之物其上者推於貴妃而自御其次者高宗崩叔陵為亂後



主賴后及吳媪救護得免是時新失淮南之地國遭大喪後主又病瘡不能聽政百司衆務假以後主命實皆

決於太后也

案陳書后陳亡後入長安隋大業十三年薨於東都年八十三

甲戌於太

極殿設無礙大齋詔內外百官各薦一人是月右衛將

軍秘書監傅縡下獄死

縡字宜事北地靈州人父曩

梁臨沂令縡幼聰敏七歲能誦古詩賦至十餘萬言長為世祖撰史學士累遷安成王記室縡篤信佛教從興皇寺惠朗法師受三論盡通其學初有大心寺曇法師

著無淨論以詆之絳乃為明道論用釋其難後主即位  
拜祕書監中書舍人掌詔誥為文典麗性敏速雖軍國  
大事下筆輒成未嘗起草然木彊不持檢操負才使氣  
凌侮人物朝士多銜之初施文慶沈客卿便佞親幸而  
絳益疎慶等因共譖毀受高麗使金後主收絳下獄絳  
素剛因獄中上書曰夫人君者恭事上帝子愛下人省  
嗜慾遠詔佞未明求衣日旰忘食是以澤被區宇慶流  
子孫陛下頃來酒色過度不虔郊廟小人在側宦豎弄

權惡忠直如仇讎視百姓如草芥公行貨賄衆叛親離  
臣恐東南王氣自斯而盡書奏後主大怒頃之意解遣  
使謂緯曰我欲赦卿卿能改過否緯對曰臣心如面臣  
面可改則心可改後主益怒命宦者李善度窮治其罪  
遂賜死獄中年五十五有文集十卷行世四月丙申立  
子胤為皇太子賜為父後者爵一級假王公已下賚帛  
有差七月辛未大赦天下是月自建康至荊州江水色  
赤如血八月丁酉天赤如火九月設無礙大會於太極

前殿捨身及乘輿御服又大赦天下辛亥夜天東北有聲如蟲飛漸移西北乙卯太白晝見

至德元年春正月大赦改元秋八月丁卯以長沙王叔

堅為司空九月丁巳天東南有聲如蟲飛冬十月封弟

九人為郡王

案陳書封弟叔平為湘東王叔教臨賀王叔宣陽山王叔穆西陽王叔儉南安王叔

澄南郡王叔興沅陵王叔韶岳山王叔純新興王

十二月丙辰頭利國遣使朝

貢戊午夜天門自西北至東南其內青黃雜色隆隆若

雷聲是歲左光祿大夫太子少傅徐陵卒 陵字孝穆

東海郊人祖超之父摛梁昭戎將軍太子左衛率母王氏常夢五色雲化為鳳集左肩上已而誕陵年數歲家人攜見寶誌上人誌以手摩頂曰天上石麒麟也光宅寺慧雲法師每嗟陵早就謂之顏回八歲能屬文十三通莊老長乃口辯縱橫起家寧蠻府參軍累遷通直散騎常侍使魏人館宴之日甚熱魏之主客魏收謂陵曰今日之熱當由徐公陵答曰昔王肅至此為魏始制禮儀今僕來聘使卿復知寒暑收大慚留連數年後隨

真陽侯蕭淵明歸陳有天下累官吏部尚書領大著作  
尚書僕射自陳創業文檄軍書及受禪制策皆陵所製  
而九錫尤美為一代文宗亦不以此矜物於後進者接  
引無倦世以此重之有集三十卷子四人儉份儀傳皆  
至班位陵第三弟孝克少通玄理曉五經正義解褐梁  
太學博士性至孝值侯景亂京邑大餓死者十有八九  
孝克養母饘粥不給其妻領軍將軍臧氏女有容色孝  
克謂妻曰今饑荒如此供養交闕欲假卿於富家望其

彼此俱濟如何臧氏初不許之孝克乃私與媒者商量  
嫁與侯景將孔景行從左右以逼之臧氏涕泣而去所  
得穀帛悉以養母孝克乃自剃髮為沙門名法整兼乞  
食以充給焉臧氏猶念舊恩亦數私致餽饋故不乏絕  
後景行戰死世平臧氏伺孝克於塗中累日乃見謂曰  
往日之事非為相負今既得脫當歸供養孝克嘿然無  
答於是歸俗更為夫妻天嘉中徵為剡令累遷散騎常  
侍國子祭酒每侍宴會無所噉至席散當其前羞膳減

損高宗密記伺之見孝克取珍菓內紳帶中歸以遺母  
高宗咨嗟久之自後宴饗孝克前饌並遣將歸餉母後  
主即位遷都官尚書陳亡隨例入長安家徒壁立母患  
思粳米粥不能辦母亡後遂終身噉麥有遺粳米者對  
之而泣開皇十九年卒於長安有子萬載位至隋太子  
洗馬

至德二年甲申正月丁卯分遣八使巡省風俗夏四月  
以江總為右僕射七月壬午皇太子加元服在位文武



賜帛有差孝悌力田為父後者爵一級鰥寡孤獨不能  
自存者人穀五石

至德三年正月戊午朔日有食之三月豐州刺史章大  
寶舉兵反四月豐州義軍主陳景詳斬大寶傳首京師  
八月戊子老人星見十一月詔修孔子廟辛巳幸長干  
寺大赦高麗百濟使來朝賀

至德四年九月辛亥武湖肆艦艦閱武宴群臣賦詩十  
月以江總為尚書令謝朓為尚書右僕射

禎明元年春正月戊寅大赦改元乙未地震四月光祿大夫毛喜卒 喜字伯武滎陽陽武人好學善草隸書起家為梁西昌侯參軍高祖鎮京口命喜與高宗俱往江陵謁元帝帝以喜為尚書及江陵陷高宗遷關右喜走郢州及高宗還喜自郢州奉迎高宗遣入關以家屬為請周冢宰宇文護執喜手曰能結二國之好者卿也遂將柳皇后及後主還初世祖謂高宗曰我諸子皆以伯為名汝諸兒宜以叔為稱高宗以訪於喜喜即條自

古名賢杜叔英虞叔卿等二十餘人以答世祖世祖稱善世祖崩僕射劉仲舉與右衛將軍韓子高等知朝望有歸乃矯太后令遣高宗還東府喜入諫高宗曰陳有天下日淺海內未夷萬邦恐悚皇后深惟社稷之計令主入省共治庶績今日之言必非太后之意宗社至重伏願三思須臾奏聞竟如其議後主即位山陵未踰年置酒作樂命喜喜不懌欲進諫及升堦後主已醉喜佯為心疾仆堦下昇去尋負氣出為南安內史禎明元年

徵還百姓沐其惠政追送者數百人道卒年七十二秋  
九月庚寅梁太傅安平王蕭巖荊州刺史蕭嘏以其文  
武官寮家屬濟江還十月以蕭巖為平東將軍乙亥割  
揚州吳郡置吳州以錢唐縣為郡屬焉是歲起部尚書  
孫瑒卒 瑒字德璉吳郡吳人祖文惠父修道瑒少倜  
儻博學經史起家梁臨川王參軍累進平南府司馬陳  
高祖即位遷散騎常侍都督荆郢武巴相五州諸軍事  
安西將軍郢州刺史天嘉初封定襄侯世祖嘗從容謂

瑒曰昔朱買臣願為本郡卿有意乎乃授持節安東將軍吳郡太守給鼓吹一部將辭乘輿幸近畿餞送鄉里榮之宣帝大建四年除安西將軍荊州刺史後主嗣位拜散騎常侍兼起部尚書瑒兄弟篤睦性通泰有財皆散之親友居處奢豪宅在青溪東大路北西臨青溪溪西即江總宅瑒家庭穿築極林泉之致歌鐘舞女當世罕儔賓客填門軒車不絕及出鎮郢州乃合十餘船為一大舫於中立池亭植芰荷良辰美景賓寮畢集泛長

江置醑酒亦一代之勝賞又立山齋設講肆集玄儒之士冬夏資奉而處已率易不以名位驕物又深有巧思多所創立及卒尚書令江總為之銘誌後主又題銘後四十字遣左戶尚書蔡徵就宅宣敕鐫之其詞略曰秋風動竹烟水驚波幾人樵逕何處山阿今朝日月宿昔綺羅天長路遠地久靈多功名未勒此意如何世論以為榮子讓早卒

案陳書次子訓知名入隋為高康太守

禎明二年春正月立皇子恮為東陽王恬為錢唐王夏

四月戊申羣鼠無數自蔡洲岸入石頭緣淮至於青塘  
兩岸數日自死隨流入江是月郢州南浦水黑如墨五  
月甲午東冶鑄鐵有物赤色如火大數升自天墜鎔所  
隆隆有聲如雷鐵鑄飛出墻外燒人家庾子廢皇太子  
肩為吳興王立始安王深為皇太子丁巳大風自西北  
激濤水入石頭城淮渚暴溢漂沒船舫己酉帝幸幕府  
山大獵初隋文帝受周禪甚敦隣好宣帝尚不禁侵掠  
大建末隋兵大舉聞宣帝崩乃命班師遣使赴弔行敵

國之禮書稱姓名頓首而後主益驕怠答書甚慢未云  
想彼統內如宜此宇宙清泰隋文覽書不悅以示朝臣  
清河公楊素以為主辱臣死再拜請罪襄邑公賀若弼  
等並求致討後主意愈驕不虞外難荒於酒色不恤政  
事左右嬖倖珥貂者五十人婦人姜貌麗服以從者千  
餘人後主嘗使張貴妃孔貴人等八人夾坐江總孔範  
姚察等十人預宴號曰狎客先令八婦人裝彩牋制五  
言詩十客一時繼和遲則罰酒君臣酣飲從夕達旦以



此為常而復盛修造起土功稅市稅船徵取百端刑罰  
酷濫初覆舟山及蔣山松柏林冬月恒出木醴後主以  
為甘露之瑞俗呼為雀餉前後災異甚多又有神人自  
稱老子以遊都下與人言而不見形言吉凶多驗經三  
四年乃去船下有聲云明年亂視之得嬰兒長三尺無  
頭又蔣山衆鳥鼓翼拊膺曰奈何帝奈何帝又建康城  
自壞又青龍出建陽門井中湧赤霧地生白黑毛又大  
風拔朱雀門又臨平湖舊常草塞不通忽然自通此湖

孫皓末年已曾開通

案吳書江表傳云自漢末年吳郡臨平湖草塞不通吳後主末忽然

自開故老相傳此湖開即太平及晉平吳天下一統永嘉初又草穢禎明初又忽開通

時後主又

自夢黃衣圍城有血霑階至卧床頭而火起又有狐入其床下捕之不見以為妖精後主乃自賣身於佛寺為奴以禳之又於郭內大皇寺造七層塔未畢功而火從中起飛向石頭城燒人家無數又使人採木於湘州城棧下至牛渚磯盡沒水中既而漁人見棧浮於海上乃起齊雲觀未就國人歌曰齊雲觀賊來無際畔始北齊

末諸省官人皆稱省主未幾而滅至是朝官亦稱省主  
識者以為省主將見省之兆也隋文帝謂高頴曰我  
為百姓父母豈可阻一衣帶之水不拯蒼生塗炭乃命  
大作戰船羣臣曰伐國大事事宜密之文帝曰吾將顯  
行天誅何密之有使投棹流下於江彼若能改吾又何  
求後主殊不知悟文帝益忿乃勅晉王廣為元帥督八  
十總管致討先送璽書暴後主二十惡又散寫詔書三  
十萬紙遍諭江外及隋軍繼下江濱鎮戍相繼奏聞施

文慶沈客卿掌機密並抑而不言及隋軍臨江諸防戍  
船艦悉還都下江中無一鬪艦上流諸軍鎮兵士皆阻  
楊素軍不得下後主聞隋軍臨江曰王氣在此齊兵三  
來周人再至皆並摧沒今虜雖來必應自敗孔範亦言  
無渡江之理但奏伎縱酒作詩不輟有東宮學士張譏  
因皇太子以進諫曰彊寇侵境沿江無禦備之敵請停  
內宴以調軍事後主大怒譏字直言清河武城人祖  
僧寶父仲悅梁尚書祠部郎譏幼好學愛立言受業於

周弘正梁大同中召補國子正言生與袁憲侍講於文德殿勅令論議諸儒莫敢先發譏整容而進咨審循環辭令溫雅梁帝器之賜裾襦絹等曰表卿稽古之力進位國子博士後主在東宮新造玉柄塵尾成後主執之曰當今多士如林至於堪捉此者獨張譏耳即手自授譏乃令於溫文殿講莊老後主即位荒殆前政及隋軍逼江孔範等言無渡江之理惟譏知其必濟又進諫請卹軍士後主大怒收下獄或救者僅獲免城陷隨例入

長安終不仕譏性恬雅所居宅舍築山池植花果講周易莊老教授門徒年七十六卒所著書易禮詩莊老等疏共一百卷皆入秘閣子孝則嗣

禎明三年春正月乙丑朔朝大霧四塞人鼻皆辛酸後主昏睡至晡乃醒是日隋將賀若弼從廣陵濟京口韓擒虎從橫江濟採石南北俱進緣江鎮戍望風盡走丙辰採石戍主徐子建馳告變是日後主方下詔曰犬羊凌縱侵竊郊畿蜂蠆有毒宜時掃定朕當親御六師

廓清八表內外並可戒嚴以驃騎將軍蕭摩訶為皇畿  
大都督樊猛為上流大都督樊毅為下流大都督司馬  
消難施文慶並為大監軍重立賞格分兵鎮守僧尼道  
士盡皆執役庚午賀若弼陷南徐州辛未韓擒虎又陷  
南徐州乃遣豫章王叔英屯朝堂追蕭摩訶屯樂遊苑  
樊毅屯閭黎寺魯達屯白土岡忠武將軍孔範屯寶田  
寺鎮東將軍任忠自吳興入戍仍屯朱雀門辛己賀若  
弼進據中山頓白土岡東南大破陳軍士卒奔北弼乘

勝破魯廣達蕭摩訶等於樂遊苑遊騎次宮城燒北掖門是日韓擒虎率衆自新林石子岡進大將軍任忠出降乃引擒虎徑至朱雀航趨宮城自南掖門入文武百司皆遁出惟尚書令江總吏部尚書姚察侍中王寬度支尚書王援等居省中尚書僕射袁憲後閣舍人夏侯公韻二人入居殿中以待後主俄頃隋兵至憲韻二人勸後主端坐殿上正色待之後主曰鋒刃之下未可交當吾自有計乃將張麗華孔貴嬪二妃入景陽樓井中



憲韻等苦諫以身蔽井後主不從與之力爭久之方得入二人拜哭而去 袁憲字德章陳郡人尚書僕射樞之弟幼聰敏年十四召為國子正言生在學一年博士周弘正深重其才舉高第以貴公子選尚梁簡文女南海公主起家秘書郎累遷南康內史入陳位僕射禎明三年隋伐陳軍人燒北掖門朝士皆散走獨憲與夏侯公韻入殿侍後主後主謂曰我從來待卿不先他人今日見卿可謂歲寒然後知松柏之後彫及隋兵入閣後

主遑遽避匿憲正色曰北軍兵人必無所犯大事如此  
陛下安之整衣冠御前殿依梁武見候景故事後主不  
從因下榻馳去憲從出後堂至景陽殿後主投下井中  
憲等拜哭而去國陷入隋文帝嘉其雅操授開府儀同  
三司昌州刺史開皇十八年卒贈大將軍安成郡公謚  
曰簡長子承家仕隋至秘書丞是日隋軍雖亂沈皇后  
居處如常太子深年十五閉閣而坐舍人孔伯魚侍側  
及隋軍叩閣入深安坐勞之曰戎旅在塗不至勞乎既

而隋軍求後主不得因窺井呼之後主初不應欲下石始聞吳人叫聲乃以繩引之驚其太重俄與張麗華孔貴嬪三人同乘而上隋文帝聞之大驚開府鮑宏曰東井上於天文為秦今王都所在投井其天意耶丙戌隋晉王廣入據臺城送後主於東宮命斬張貴妃於青溪橋 妃姓張字麗華襄陽兵家女素貧賤父兄織席為業後主為太子以選入東宮侍龔良娣給使後主見悅之因得幸生太子深後主即位拜貴妃始興王叔陵構

亂後主被傷卧於承香閣中諸妃並不敢進惟貴妃侍  
焉至德二年於光昭殿前起臨春結綺望仙等三閣閣  
高數丈並數十間牕牖戶壁欄檻皆以沉檀香木為之  
又飾以金玉珠翠外施珠簾內有寶帳其服玩之屬瓌  
寶珍麗皆近古所未有每微風一至香聞數里朝日初  
照光映後庭其下積石為山引水為池植以奇樹雜以  
花果後主自居臨春閣張貴妃居結綺閣龔孔二貴嬪  
居望仙閣並複道交相往來又有王李二美人張薛二

淑媛袁昭儀何婕妤江修容等七人並有寵遞代以遊其閣上官人有文學如袁大捨等並為女學士後主每引賓客同貴妃等遊宴使諸貴人及女學士與諸狎客共賦新詩互相贈答采其尤艷麗者以為曲詞被以新聲選宮女有容色者以千百數令習而歌之分部迭進持以相樂有玉樹後庭花臨春樂等大抵所歸皆美張貴妃孔貴嬪之容色其略曰璧月夜夜滿瓊樹朝朝新皆此之類也張麗華髮長七尺鬢黑如漆其光可鑑特

聰惠有神彩進止閒雅容色端麗每瞻視顧盼光彩溢  
日照映左右常於閣上靚粧臨軒檻宮中遙望杳若神  
仙兼有才理辯識強記善候人主顏色薦引宮女假鬼  
道以惑後主後主怠於政事百司啟奏並因宦者蔡臨  
兒等進之後主置張妃於膝上共決之有不能記者貴  
妃並為疏條無所遺脫由是益加寵異冠於後宮更於  
闈宦便佞之徒內外交結轉相引致賄賂公行綱紀廢  
亂及隋軍陷城與後主俱入井中後為晉王廣斬於青

漢三月己巳後主與王公卿士内外文武百司發自建康而入長安隋文詔京城權分人家第宅以禮接待之遣使迎勞使人還奏曰後主已下在路五百餘里纍纍不絕文帝歎曰一人無良以至於此及至京師列輿服器皿等於庭引後主及二太子諸王弟二十八人及司空司馬消難尚書令江總僕射袁憲驃騎將軍蕭摩訶征西將軍樊毅安北將軍魯廣達鎮東將軍任忠吏部尚書姚察中書令蔡徵散騎常侍王元規等二百餘人

帝使納言宣慰內使宣詔讓後主後主伏地雀息不能  
祇對並赦宥之賜封長城侯文武皆隨才擢用詔下江  
南陳文武宣帝陵各給五戶看守之給賜後主甚厚常  
引同三公之席勅樂戶不奏吳音之樂恐傷其心至仁  
壽四年冬十一月壬子終於洛陽葬河南之芒山沈  
皇后自為哀策詞甚酸楚 后諱務華吳興人儀同三司  
沈君理之女母高祖女會稽公主早亡后年幼哀慟過  
禮大建三年納為太子妃後主即位立為后性端靜好



學工書當張貴妃盛寵勢傾後宮澹然居求賢殿未嘗有怨尤之容居處儉約衣無錦繡左右近侍纔留五人

惟尋閱圖史及佛經陳亡與後主俱入長安及後主薨

后感其家國亡滅自為哀誄詞甚悲切

案後主年三十即位立七年年

三十七以陳禎明三年當開皇九年正月二十日國亡入隋封為長城侯後十五年五月十二薨有子二十二

人初陳高祖即位日其夜奉朝請史普直宿省中夢有

人自天而下導從數十人至太極前殿北面執策策金

字曰陳氏五帝三十四年又後主在東宮有婦人突入

唱曰畢畢國國主尋而不見又嘗有一足鳥集於殿  
庭以背畫城成文曰獨足上高臺茂草化為灰欲知我  
家處朱門向水開解者以為獨足蓋指後主獨行無衆  
盛草言荒穢也隋承火運草得火故為灰矣及後主至  
京師與其家屬館於都水臺所謂上高臺當水開者其  
言皆驗初宣帝器宇弘廓有人君之量文帝知冢嗣仁  
弱早存太伯之心未及而崩既承萎蕪之後志慕鴻運  
拓土開疆晚致呂梁之敗江左日蹙後主因削弱之餘

滅亡之運加以荒淫沉敗酒色過度梁末童謠曰可憐  
巴馬子一日行千里不見馬上郎但見黃塵起黃塵汚  
人衣皂莢相料理及王僧辯滅羣臣以謠言奏高祖曰  
王僧辯本乘巴馬以擊侯景馬上郎王字也塵為陳也  
世不解皂莢之義及陳滅於隋隋氏姓楊楊羊也說者  
以江東人謂殺羊角為皂莢言終滅於隋夫興廢之兆  
其由來定矣

陳朝功臣

江總字總持濟陽考城人晉散騎常侍統十代孫宋光祿大夫洪五代孫祖奮父經皆列職中外總性至孝少孤養於外家蕭氏好學年十八起家梁武陵王法曹參軍累至太子洗馬侯景亂隨舅蕭勃在廣州侯景平後梁元帝徵為明威將軍入陳累位司徒左長史太常卿尚書令中權將軍入隋為上開府開皇十四年卒於江都

蕭摩訶字元肩南蘭陵人祖靚父諒卒於始興摩訶少

孤姑夫蔡路養收養之少果毅有勇力高祖破路養摩訶出戰敗歸侯安都常從征伐先登陷陣累至巴山太守大建五年隨吳明徹北伐濟江攻秦郡齊軍大至衆十餘萬其前隊有蒼頭犀角大力之號皆身長八尺膂力絕倫又有西域胡人妙嫻弓矢弦不虛發來氣甚銳衆軍尤憚之明徹自起酌酒飲摩訶曰關侯斬顏良正今日矣摩訶飲訖馳馬挺身入齊軍遙擲銃銳擊中胡人又斬十餘大力者而還齊兵莫不驚懼後從戰呂梁

突衆手奪齊軍大旗屢以戰功進驃騎大將軍侍中光祿大夫舊制三公黃閣廳置鷓尾後特詔摩訶開黃閣門施行馬廳事寢堂並置鷓尾仍納其女為皇太子妃及隋軍來韓擒虎賀若弼進至鍾山龍尾後主謂摩訶曰公可為我一決摩訶曰從來行陣為國為身今日之事兼為妻子摩訶引兵於賊軍南偏鎮東大將軍任忠次之護軍樊毅尚書孔範又次之衆軍南北亘二十里首尾各不相知遂戰魯廣遠率所部俱進陣未合士卒

潰散摩訶無所用力為隋軍所執及京師陷後主為隋人守衛於內省摩訶請弼曰今為囚虜命在須臾願一見舊主死無所恨弼許之摩訶入見後主俯伏號泣仍於舊廚取食進之辭訣而去守衛者皆不能仰視入隋為開府後同漢王諒反於并州伏誅

樊毅字智烈南陽人祖方興梁同州刺史父文熾梁益州刺史叔父文皎侯景亂戰死於青溪毅陳亡入關頃之卒

魯廣達字遍覽吳州刺史悉達之弟廣達少聰悟慷慨  
愛賓客累至壯武將軍晉州刺史及王僧辯之下平侯  
景廣達出境候接資奉軍儲僧辯謂沈炯曰魯晉州亦  
是王師東道主人進位散騎常侍陳有天下累以功勞  
至安南將軍侍中轉安北將軍入隋悲愴本朝淪沒發  
疾而卒

任忠字奉誠小名蠻奴汝陰人少孤微不為鄉里所齒  
晉熙太守梅伯龍討景累遷蕩寇將軍陳有天下進號



征南將軍給鼓吹一部尋加侍中信安郡王出為吳興  
內史及隋軍到白土岡忠馳入啟白當具舟楫以就上  
流臣以死奉衛後主信之令宮人裝束以待久望不至  
既而忠已率數十騎往石子崗降於韓擒虎後入隋為  
開府儀同三司卒隋文帝嘗因宴集謂羣臣曰我常恨  
初平陳之日不先斬任蠻奴以懲不忠

蔡徵字希祥侍中中撫軍景歷之子徵幼聰敏累遷吏  
部尚書為人清簡無事京城陷入隋為民部尚書給事

中有口辯多所詳究至於仕流官宦皇宗戚屬及朝儀  
制度憲章軌則戶口風俗山川土地問無不對子翼位  
至司徒

姚察字伯審吳郡武康人六歲誦書萬餘言十二能屬  
文起家梁朝司文侍郎梁室傾亂崎嶇采野實以供給  
養入於已分減推諸弟妹乃至故舊亦皆相分自甘藜  
藿雖亂離之中篤學不廢陳有天下累進位尚書祠部  
郎中轉祕書監領著作入隋為祕書郎別勅成梁陳二

代史隋文帝嘗召察謂朝臣曰我平陳惟得察一人而已大業二年卒於東都

王元規字正範太原晉陽人祖寶父偉早卒元規八歲而孤隨母舅氏往臨海郡年十二郡豪劉瑱有財巨萬欲以女妻之母將許焉元規泣諫曰因不失其親古人所重豈得苟安異壤輒婚非類母感其言而止梁時山陰縣有暴水流漂居人元規惟有一小船倉卒引其母妹并姑姪等並入船留其男女三人閣於樹杪及水退

俱獲全濟世人稱其志行少好學起家為梁相國左常侍陳有天下累遷散騎常侍南平王府參軍自梁諸儒相傳為左氏學者皆以賈逵服虔之義難駁杜預凡一百八十一條元規引證通析無復疑滯禎明三年入隋為秦王府東閣祭酒年七十卒於廣陵所著春秋發題辭及義記十卷續經典大義十四卷孝經義兩卷左傳音三卷禮記音兩卷

建康實錄卷二十